

# Kontuola

ANTZUOLA / Egubakoitza / 2002ko martxoaren 8a / 104. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

## Ika-mikak Udalean, gastu igoerak direla-eta


AINTZANE IRIZAR

EAJ alderdiak joan zen egubakoitzean etxe guztietara banatu zuen idatziari erantzun nahi izan diote Batasuna eta Zutik alderdiek beste idatzi batekin. Izandako gastu igoeraren zergatiak azaltzeko batzarra deitu dute biharko, zapatua, udaletxean.

Sagasti, Olaran eta frontoi inguruko lanak eta horietan izandako gastu igoerak direla-eta, ika-mikak sortu dira Udaleko alderdien artean.

Iaz, abenduko osoko bilkuran, lan horietan sortutako kostu igoerari aurre egiteko mailegua eskatzeko aukera aztertu zuten, eta EAJ eta EAko zinegotziek mailegu hori eskatzearen aurka bozkatu zuten; lan horien gaineko informazioa aztertu ondoren, "aurrera eramandako prozedura normala ez zela" izan adierazi zion orduan KONTUOLARI Jose Angel Zabalo EAJko Udaleko zinegotziak.

Joan den egubakoitzean, horren guztiaren inguruko idatzi bat banatu zuen Antzuolako EAJ alderdiak herriko etxe guztietan. Idatzi horretan "Udaleko arduradun nagusien kudeaketa" txarra izan dela eta "arduradun horiek ardura barik jokatu dutela" salatu nahi izan du EAJk; bide batez, "gestio txar eta ilun horren zergatiak zeintzuk izan diren" azaltzeko eskatu die EAJk alkateari eta bere taldekideei.



Sagasti, Olaran eta frontoi aurreko lanetan aurrez ikusitako gastuak igo egin dira.

### BATASUNA ETA ZUTIK ALDERDIEN ERANTZUNA

Berehala iritsi da Batasuna eta Zutik alderdien erantzuna ere. Bi alderdi horiek alderdi jeltzalearen testuari beste idatzi batekin erantzun diote.

Idatzi horretan, Sagastiko, Olarango eta frontoi aurreko lanetan izandako gastu igoeren zergatiak azaldu nahi izan dituzte alderdi bi horiek. Bestalde, Batasunak eta Zutikiek adierazi dute hartu dituzten erabakiak "herri-

tarren onerako zirelakoan" hartu dituztela. Eta, horrekin batera, zera gaineratu dute: "Sortutako desbideraketaren erantzukizuna geure gain hartzen dugu tokatzen zaigun neurrian".

Azkenik, zapatu goizean, 11:30ean, udaletxeko osoko bilkuren aretoan jendaurreko azalpena egingo dutela adierazi dute Batasunak eta Zutikiek, ahalik eta informazio zehatzena emateko eta herritarren galderei erantzuteko.

## ETXEKO ANIMALIAK

### Animalien ugazabei idatzia bidaliko zaie

Udalaren helburua da animalien ugazabak sentsibilizatzea, eta animalien gaineko arauak jasotzen dituen Udal ordenantzaren berri ematea. Iazko ekainean onartu zuen Udalak ordenantza hori, eta animaliekin lotutako hainbat gai arautzen ditu; besteak beste, animaliekiko tratua, garbitasuna, elikadura edota animalien babesa.

Gaur egun animaliekin herrian dagoen arazorik nabarmena da kalean egiten dituz-

tela txakurrek euren eginbeharrak, sarritan oinezkoen guneak zikinduz. Hori saihesteko udal ordenantza helaraziko diete etxean animaliak dituzten herritarrei, eta baita idatzi bat ere, arauak diotena betetzeko eskatuz.

Gipuzkoako Foru Aldundia-ri eskatu diote txakurrak dituzten antzuolarren zerrenda; errola hori jaso bezain pronto hasiko dira Udaleko arduradunak esandako informazio guztia animalien ugazabei bidaltzen.

## ZABORRA

### Mankomunitatearen esku edukiontziak

Orain arte Antzuolako Udalaren ardura izan dira herriko zabor edukiontziak. Otsaila amaieratik, baina, Debagoieneko Mankomunitatearen esku geratu dira. Gauzak horrela, Mankomunitateak kontratatutako enpresa bat arduratuko da edukiontzi horiek hustu eta garbitzeaz. Baita, hondatzen direnean, konpondu edo berriak jartzeaz ere.

Ibarreko gainerako herrietan oraintxe ari da Mankomunitatea edukiontziak jartzen. Antzuolako kasuan, berriz, ez da edu-

kiontzi berririk jarriko; daude- nak Mankomunitatearen eskura pasatuko dira. Izan ere, Udalak edukiontziak edukita, berriak erostea alferreko gastua zela ikusi zuten.

Joan den astean, hondatuta zeuden hainbat edukiontzi konpondu eta hiru berri jarri zituen Mankomunitateak.

Guztira 34 edukiontzi daude herriko hainbat gunetan; 1.000 litroko edukiera dauka bakoitzak. Gainerako herrietan hantxegoko jartzen ari dira.



INDUSTRI MANTENIMENDUA

Jose  
Gomez  
Abad

Errekalde 6, 4-B.  
Antzuola  
943 76 60 19  
943 76 60 43  
Faxa:  
943 76 60 19

LARREA

TABERNA

Kalebarren 17  
ANTZUOLA



Jose Luis Zabalo

Birgaitzeak • Fatxadak  
Teillatuak  
Sukalde eta bainu gelak

Kalegoi 9, 1a., ANTZUOLA.  
Tf. 943 76 60 89

GoROSTI

Taberna

943 76 62 96  
Zurrategi plaza  
ANTZUOLA

## IRAKURLIAREN TXOKUA

### PINTADEN INGURUAN

Herrian azaldu diren pintadak direla eta, *El Diario Vasco* egunkariko Antzuolako berriemaileak joan zen astean KONTUOLAn idatzitako adierazpenak benetan larriak iruditzen zaizkigu.

Kazetari horrentzat Antzuolako berriak ia-ia kirolera mugatzen dira. Herriko bi erakunde ilegalizatu ditu Garzonek: Segi eta Askatasuna. Hori ez omen da berri aipagarria. Gazteak antolatzea ilegal da eta klandestinitatera bultzatu dira. Hori ez omen da berri aipagarria. Hori bai, herrian pintadak azaltzea notizia da. Pintadak inori ez zaizkigu gustatzen, baina pintada horien arrazoiak zeintzuk diren ikusi beharra dago. Kazetari horren komunikabideak eta beste hainbatek txalotu egiten dituzte ilegalizazioa, espetxeratze masiboak...; eta, aldi berean, estali egiten dituzte torturak, Iruñeko 28 eguneko gose greba eta abar. Egoera honetan, zein bide gelditzen zaie gazteei euren egoera kaleratzeko eta euren proiektuak bideratzeko?

Benetan larria iruditzen zaigu kazetari horrek Garzon eta Aznarren erantzuna desiratzea. Tristeza da gure herriak jasaten duen egoera konpontzeko bide errepresiboa aukeratzeko duen jendea egotea Antzuolan.

Bukatzeko, Antzuolako pintadak kentzearen kostuak gure jubilatuen soldatak murrizten dituela insinuatzea demagogia merkea da. Kazetaritza ikasketak bukatu dituen batengatik hori baino argudio pisuzkoagoak espero zitezkeen.

ANTZUOLAKO  
BATASUNA

## ELKARRIZKETA

AMAIA VÁZQUEZ/PSIKOLOGOA

# “Umeei egia esan behar diegu beti, eta egindako galdera guztiei erantzun”

A.I.

**E**guaztenean, hilaren 13an, 18:30ean, hitzaldia egingo du Amaiak eskolan. Zazpi urte bitarteko umeen gurasoei zuzenduta dago hitzaldia. Hilaren 20an, berriz, zazpi eta 12 urte bitarteko gurasoendako egingo du berbaldia.

### Zer eskaintzen diete gurasoei era honetako hitzaldiek?

Gurasoek informazioa behar dute ulertzeko, alde batetik, zergatik gertatzen diren adierazpen sexual batzuk, baita sexualitatea zer den ulertzeko ere. Izan ere, askotan sentitzen dugu sexualitatea dela praktika sexualak izatea, eta hori ez da horrela, bestela ezin izango genuke umeen sexualitateaz berba egin.

### Gurasoek zer erakutsi behar diete umeei sexualitateaz?

Nahita edo nahi gabe, beti ari gara zerbait erakusten. Garapen psiko-afektibo sexuala oso garrantzitsua da pertsonok gure identitatea finkatzeko. Eta familiak izugarritzko ardura du. Kontu horiek guztiak eskolan lantzen dira, baina batez ere bizipena landu behar da, eta hori familian lantzen da. Aita eta ama, nahita edo nahi gabe, seme-alabentzako sexualitate eta maitasun eredu izaten dira, eta hori jakin behar dute gurasoek. Ikusi behar dugu zer garrantzia daukaten gure mezuek, gure bizipenek, euren hazkuntzan.

Umeei ikusten badute gurasoek lasai berba egiten dutela plazerraren gainean, elkarren artean erakarri egiten direla eta hori adierazten dutela, era baten ulertuko dute sexualitatea. Baina, gaia aipatu ere ez bada egiten, umeei barneratzen dutena da gai hori sekretua dela, intimoa dela, debekatuta dagoela.

### Baina zenbateraino erakutsi eta zer ezkatatu?

Egia da bikotearen intimitate afektibo eta sexualari eutsi egin behar zaiola, baina beste



ARETXAGAZETA

*“Aita eta ama sexualitate eta maitasun eredu izaten dira seme-alabentzako”*

guztia erakutsi behar zaie. Galdera hori, gainera, guraso askok egiten digute. Haurtzaroen izaten dituzte gurasoek zalantza gehien. Nik beti esaten diet egia esan behar diegula umeei, eta egiten dizkiguten galdera guztiei erantzun behar diegula.

*“Identitate sexuala deskubritzeko, euren gorputzarekin jolasten laga behar zaie umeei”*

### Umeari noraino laga behar zaio bere gorputzarekin jolasten?

Hor ez dago mugarik. Euren identitate sexuala deskubritzeko, euren gorputzaz jabetu behar dira, eta laga egin behar zaie euren gorputzarekin jolasten.

## KIROLA

### PARTIDUAK

#### FUTBOLA

Martxoak 9  
11:00: Antzuola-Beraun Touring (Kad.)  
Martxoak 10  
12:00: Antzuola-Intxurre (Gazteak)  
16:30: Antzuola-Ikasberri (2. erregion.)

#### PILOTA

Martxoak 9 (Udaberri Saria)  
17:30: Olalde-Ikaskirola (eskuz kadet.)  
Martxoak 12 (Debarroko Txap.)  
19:00: Olalde-Bergara

### EMAITZAK

#### FUTBOLA

Antzuola 1 Trintxerpe B 2 (2. erreg.)  
Antzuola 0 Bergara 0 (Neskak)  
Burumendi 2 Antzuola 0 (Gazteak)  
Urola 2 Antzuola 3 (Kadeteak)

#### PILOTA

Udaberri Saria  
Gure Txeru-Olalde (eskuz kad.) . . . 22-20  
Olalde-Murumendi (eskuz nag.) . . . 22-15  
Olalde-Altzaterra II (paletaz) . . . 19-35  
Deba Arroko txapelketa  
Olalde-Eskoriatza (kadeteak) . . . 7-22  
Olalde-Eskoriatza (nagusiak) . . . 22-17

#### ESKOLA KIROLA

Eskubaloia, benjaminak  
Antzuola A-Aranzadi "6" . . . . . 1-1  
Antzuola B-San Martin A . . . . . 2-0  
Saskibaloia, alebinak  
Antzuola-Aranzadi 10 (nesk.) . . . 56-6  
Antzuola A-Aranzadi 10 (mut.) . . . 34-20  
Antzuola B-Aranzadi 11 (mut.) . . . 10-26

## LABUR

### Erretiratuek batzar orokorra dute bihar, zapatua

Bihar, zapatua, egingo du erretiratuen elkarteak urteko batzar orokorra, arratsaldeko seietan, Zurrategiko egoitzan. Aurreko urteko balantzea eta 2002ko egitasmoak jorratuko dituzte batzarrean.

### Traste zaharrak ateratzeko aukera, hilean bi bider

Hilean bi bider izango dugu Antzuolan traste zaharrak ateratzeko aukera: hileko lehen-dabiziko eta hirugarren egue-nean. 20:00etatik 22:00etara atera beharko dira, eta zabor edukiontzien ondoan laga.

# EGAÑA

Era guztietako arotz lanak

Tarima eta parketa jartzea  
Zoruen kutxilatu eta barnizatuak

Kalegori 21, ANTZUOLA Tel.: 943 76 64 23



Langela: Kalebarren 4  
Saltokia: Herriko plaza  
943 76 64 35  
ANTZUOLA



Herriko plaza 4. ☎ 943 78 70 66. ANTZUOLA